


大智度論

第三十九

二百十一
名九

48875-



Vertical text impression, likely a library or archival stamp.

大智度論卷第三十九

龍樹菩薩造

姚秦三藏法師鳩摩羅什譯

釋第四品中

舍利弗有菩薩摩訶薩行般若波羅蜜得四禪
 四無量心四無色定遊戲其中入初禪從初
 禪起入滅盡定從滅盡定起乃至入四禪從
 四禪起入滅盡定從滅盡定起入虛空處
 虛空處起入滅盡定從滅盡定起乃至入非
 有想非無想處從非有想非無想處起入滅
 盡定如是舍利弗菩薩摩訶薩行般若波羅
 蜜以方便力入超越定問曰若凡夫人不能
 入滅盡定云何菩薩從初禪起入滅盡定答



曰阿毗曇鞞婆沙中小乘如是說非佛三藏說又是菩薩聖人尚不及何況當是凡夫譬如六牙白象雖被毒箭猶憐愍惡賊如是慈悲心阿羅漢所無畜生中猶尚如是何況作人身離欲入禪而不得滅盡定問曰若菩薩得滅盡定可亦超越定法不能過二若言從初禪起乃至入滅盡定無有是法答曰餘人雖有定法力少故不能遠超菩薩無量福德智慧力深入禪定心亦不著故能遠超譬如人中力士趨不過三四丈若天力士無復限數小乘法中起一者是定法菩薩禪定力大心無所著故遠近隨意問曰若亦者超越者

是大次第定不應為大。答曰：二俱為大。所以者何？從初禪起至二禪，更無餘心。一念得入，乃至滅盡定，皆亦超越者。從初禪起入第三禪，亦不令餘心雜。乃至滅盡定，逆順皆亦有人言超越定勝，所以者何？俱無餘心雜，而能超越。故譬如槃馬迴轉，隨意。

舍利弗有菩薩摩訶薩行般若波羅蜜，修四念處，乃至十八不共法，不取須陀洹果。斯陀含果、阿那含果、阿羅漢果、辟支佛道，以方便力為衆生故，起八聖道分，以是八道令得須陀洹果，乃至辟支佛道。佛告舍利弗：一切阿羅漢、辟支佛果及智，是菩薩摩訶薩無生法。

忍舍利弗當知是菩薩摩訶薩行般若波羅

蜜在阿鞞跋致地中任問曰何以不說是菩

薩行六波羅蜜而但說得四念處答曰若說

若不說當知菩薩皆行六波羅蜜於三十七

品或行或不行不證聲聞辟支佛道者有大

慈大悲深入方便力等如先說問曰自不得

諸道果云何能以化人答曰佛自說因緣所

謂聲聞辟支佛果及智皆是菩薩法忍但不

受諸道果名字果及智皆入無生法忍中復

次唯不取證餘者皆行得菩薩道故名爲阿

鞞跋致

舍利弗有菩薩摩訶薩任六波羅蜜淨兜率

天道當知是賢劫中菩薩釋曰菩薩有各各道各各行各各願是菩薩修業因緣生兜率天上入千菩薩會中次第作佛如是相當知是賢劫中菩薩

舍利弗有菩薩摩訶薩修四禪乃至十八不共法未證四諦當知是菩薩一生補處問曰是一生補處菩薩應生兜率天云何說得四禪等答曰是菩薩生兜率天上離欲得四禪等復次是補處菩薩離欲來久具足佛法以方便力隨補處法生兜率天未證四諦者故留不證若取證者成辟支佛

舍利弗有菩薩摩訶薩無量阿僧祇劫作行

得阿耨多羅三藐三菩提釋曰是菩薩雖種
善根阿耨多羅三藐三菩提以鈍根雜行故
久乃得之以深種善根故必得

舍利弗有菩薩摩訶薩住六波羅蜜常勤精
進利益衆生不說無益之事釋曰是菩薩先
有惡口故發菩薩心願言我永離口四過得
是道復次此菩薩知是般若波羅蜜中諸法
無有定相不可著不可說相故如是知能益
利者皆是佛法若不能利益雖種種好語非
是佛法譬如種種好藥不能破病不名為藥
趣得土泥等能差病者是名為藥以是故恐
其謬錯故不說無益之事

舍利弗有菩薩摩訶薩行六波羅蜜常勤精進利益衆生從一佛國至一佛國斷衆生三惡道釋曰是菩薩住六神通到十方世界遮上中下三種不善道

舍利弗有菩薩摩訶薩住六波羅蜜以檀爲首安樂一切衆生須飲食與飲食衣服卧具瓔珞華香房舍燈燭隨所須皆給與之釋曰菩薩有二種一者能令衆生離苦二者能與樂復有二種一者憐愍三惡道衆生二者憐愍人是菩薩與衆生樂憐愍人故隨所須皆與之

舍利弗有菩薩摩訶薩行般若波羅蜜時變

身如佛爲地獄中衆生說法爲畜生餓鬼中衆生說法問曰是菩薩何以變作佛身似不尊重作佛答曰有衆生見佛身得度者或有見轉輪聖王等餘身得度者以是故變身作佛復次世間稱佛名字是大悲是世尊若以佛身入地獄者則閻羅王諸鬼神不遮礙是

我所尊者師云何可遮問曰若地獄中火燒常有苦痛心常散亂不得受法云何可化答曰是菩薩以不可思議神通力破鑊滅火禁制獄卒放光照之衆生心樂乃爲說法聞則受持問曰若尔者地獄衆生有得道者不答曰雖不得道種得道善根因緣所以者何以

重罪故不應得道畜生道中當分別或得者
或不得者如阿那婆達多龍王娑竭龍王等
得菩薩道鬼神道中如夜叉密迹金剛鬼子
母等有得見道是大菩薩

舍利弗有菩薩摩訶薩行六波羅蜜時變身
如佛遍至十方如恒河沙等諸佛世界為衆
生說法亦供養諸佛及淨佛世界聞諸佛說
法觀採十方淨妙佛國相而以自起殊勝世
界其中菩薩摩訶薩皆是一生補處釋曰是
菩薩遍為六道說法以佛身為十方衆生說
法若衆生聞弟子教者不能信受若聞佛獨
尊自在者說法信受其語是菩薩二事因緣

故供養諸佛莊嚴世界聞莊嚴世界法到十方佛國取清淨世界相行業因緣轉復殊勝光明亦多所以者何此國中皆一生補處菩薩問曰若先已說兜率天上一生補處菩薩今云何說他方世界菩薩皆一生補處答曰兜率天上一生補處者是三千世界常法餘處不定所謂第一清淨者轉身成佛道故舍利弗有菩薩摩訶薩行六波羅蜜時成就三十二相諸根淨利諸根淨利故衆人愛敬以愛敬故漸以三乘法而度脫之如是舍利弗菩薩摩訶薩行般若波羅蜜時應學身清淨口清淨釋曰是菩薩欲令衆生眼見其身

得度故以三十二相莊嚴身諸根淨利者眼
等諸根明利出過餘人信慧根諸心數根等
利淨第一見者歎其希有我無此事愛敬是
菩薩信受其語世世具足道法以三乘道入
涅槃是三十二相眼等諸根皆從身口業因
緣清淨得以是故佛說菩薩應當淨身口業
舍利弗有菩薩摩訶薩行六波羅蜜得諸根
淨以是淨根而不自高亦不下他釋曰是菩
薩常深淨行六波羅蜜故得眼等諸根淨利
人皆愛敬慧等諸心數法根淨利無比爲度
衆生故世間常法若得殊異心則自高輕諸
餘人作是念汝無此事我獨有此以是因緣

故還失佛道如經中說菩薩輕餘菩薩念念
一劫遠於佛道經介所劫更修佛道以是故
而不自高亦不下他

舍利弗有菩薩摩訶薩從初發心住檀波羅
蜜尸羅波羅蜜乃至阿鞞跋致地終不墮惡
道釋曰是菩薩從初已來性畏惡道所作功
德願不墜墮乃至阿鞞跋致地者以未到中
間畏墮惡道故作願菩薩作是念若我墮三
惡道者自不能度何能度人又受三惡道苦
惱時以瞋惱故結使增長還起惡業復受苦
報如是無窮何時當得修行佛道問曰若持
戒果報不墮惡道者何以復說布施答曰持

戒是不墮惡道根本布施亦能不墮復次善
薩持戒雖能不墮惡道中生人中貧窮不能
自利又不益人以是故行布施餘波羅蜜各
有其事

舍利弗菩薩摩訶薩從初發心乃至阿鞞跋
致地常不捨十善行釋曰佛說持戒故不墮
惡道布施隨逐今不知云何行尸羅波羅蜜
乃至阿鞞跋致地是故復說常行十善復次
先菩薩持戒不牢固布施隨助今說但持戒
牢固不捨十善不墮三惡道

舍利弗有菩薩摩訶薩住檀波羅蜜尸羅波
羅蜜中作轉輪聖王安立衆生於十善道亦

以財物布施衆生釋曰是檀尸波羅蜜因緣
故作轉輪聖王行尸羅波羅蜜故能令衆生
信受十善行檀波羅蜜故以財寶給施衆生
亦不可盡問曰一切菩薩皆行是二波羅蜜
作轉輪聖王不荅曰不必然也何以故如此
品中諸菩薩種種法入佛道有菩薩聞轉輪
聖王儀法在此處能利益衆生故作是願或
有菩薩種轉輪聖王因緣雖不作願亦得轉
輪聖王報自行二波羅蜜故作轉輪聖王亦
教一切衆生行十善道亦自行布施聞者生
疑爲一世作爲世世作以是故佛告舍利弗
有菩薩摩訶薩住檀波羅蜜尸羅波羅蜜無

量千万世作轉輪聖王。值遇無量百千諸佛，
供養恭敬，尊重讚歎。釋曰：若菩薩知作轉輪
聖王大益衆生者，便作轉輪聖王。若自知餘
身益大，亦作餘身。復次，欲以世間法大供養
佛，故作轉輪聖王。

舍利弗有菩薩摩訶薩，常爲衆生以法照明，
亦以自照。乃至阿耨多羅三藐三菩提，終不
離照明。舍利弗是菩薩摩訶薩於佛法中已
得尊重。舍利弗以是故，菩薩摩訶薩行般若
波羅蜜時，身口意不淨，不令妄起。釋曰：上菩
薩行檀尸波羅蜜，作轉輪聖王是菩薩。但分
別諸經誦讀憶念思惟，分別諸法以求佛道。

以是智慧光明自利益亦能利益衆生如人
闇道中然燈亦能自益亦能益人終不離者
是因緣故終不離智慧光明乃至阿耨多羅
三藐三菩提復次是菩薩清淨法施不求名
利供養恭敬不貪弟子不恃智慧亦不自高
輕於餘人亦不譏刺但念十方諸佛慈心衆
生我亦如是學佛道說法無所依止適無所
著但爲衆生令知諸法實相如是清淨說法
世世不失智慧光明乃至阿耨多羅三藐三
菩提已得尊重者上諸菩薩能如是者於諸
衆生皆爲尊重身口意不淨不令妄起者能
以清淨法施者不應雜起身口意惡業所以

者何若起身口意惡者聞者或不信受若意
不淨智慧不明智慧不明不能善行菩薩道
復次不但此一菩薩上來菩薩能行此法者
皆名尊重佛教若菩薩欲行菩薩道皆不應
雜罪行一切惡罪業不令妄起雜行者於行
道則難不能疾成佛道罪業因緣壞諸福德故
舍利弗白佛言世尊云何菩薩身業不淨口
業不淨意業不淨問曰舍利弗智慧第一何
以故不識身口意惡業答曰舍利弗於聲聞
法中則知菩薩事異故不知如說若菩薩生
聲聞辟支佛心是為菩薩破戒以是故舍利
弗疑不知何者是菩薩罪非罪復次舍利弗

知身三不善道口四不善道意三不善道是
為身口意罪此中佛答若菩薩取身口意相
是則為菩薩身口意罪如是等因緣故舍利
弗問

佛告舍利弗若菩薩摩訶薩作是念是身是
口是意如是取相作緣舍利弗是名菩薩身

口意罪舍利弗菩薩摩訶薩行般若波羅蜜
時不得身不得口不得意舍利弗菩薩摩訶
薩行般若波羅蜜時若得身得口得意用是
得身口意故能生慳心犯戒心瞋心懈怠心
乱心癡心當知是菩薩行六波羅蜜時不能
除身口意麁業釋曰佛示舍利弗法空中菩

薩不見是三業是為無罪若見是三業是為
罪聲聞法中十不善道是為罪業摩訶衍中
見有身口意所作是為罪所以者何有作有
見作作見者皆是虛誑故麁人則麁罪細人
則細罪如離欲界時五欲五蓋為惡罪初禪
攝善覺觀為無罪離初禪入二禪時覺觀為
罪二禪所攝善喜為無罪乃至非有想非無
想處亦如是入諸法實相中一切諸觀諸見
諸法皆名為罪小乘人畏三惡道故以十不
善業為罪大乘人以一切能生著心取相法
與三解脫門相違者名為罪以是事異故名
為大乘若見有是三業雖不起惡亦不名牢

固不見是身口意是業根本是為牢固是善
薩法空故不見是三事用是三事起慳貪相
犯戒相瞋相懈怠相散亂相愚癡相因無故
果亦無如無樹則無蔭若能如是觀者則能
除身口意麁業問曰先說罪業今何以故言
麁業答曰麁業罪業無異罪即是麁不名為
細復次聲聞人以身口不善業名為麁意不
善業名為細瞋恚邪見等諸結使名為麁罪
愛慢等結使名為細罪三惡覺所謂欲覺瞋
覺惱覺名為麁親里覺國土覺不死覺名為
細但善覺名為微細於摩訶衍中盡皆為麁
以是故此說麁罪

舍利弗白佛言世尊菩薩摩訶薩云何除身
口意麤業佛言舍利弗若菩薩摩訶薩不得
身不得口不得意如是菩薩摩訶薩能除身
口意麤業復次舍利弗菩薩摩訶薩從初發
意行十善道不生聲聞心不生辟支佛心如
是菩薩摩訶薩能除身口意麤業問曰何等
身口意細業與相違者為鹿答如向所說者
是復次凡夫人業於聲聞業為鹿聲聞業於
大乘為鹿復次垢業為鹿非垢業為細能生
苦受因緣業為鹿不生苦受因緣業為細有
覺有觀業為鹿無覺無觀業為細復次見我
乃至知者見者為鹿若不見我乃至知者見

者但見三業處五衆十二入十八界爲細復
次有所見者名爲麁無所見者名爲細以是
故佛告舍利弗若菩薩不得身口意是時則
除三麁業復次初發意住畢竟空中一切法
不可得而常行十善道不起聲聞辟支佛心
以不取相心一切諸善根皆迴向阿耨多羅
三藐三菩提是名菩薩除身口意業麁罪名
爲清淨

舍利弗有菩薩摩訶薩行般若波羅蜜淨佛
道時行檀波羅蜜尸羅波羅蜜羂提波羅蜜
毗梨耶波羅蜜禪波羅蜜舍利弗白佛言世
尊何等是菩薩摩訶薩佛告舍利弗佛

道者菩薩摩訶薩不得身不得口不得意不
得檀波羅蜜乃至不得般若波羅蜜不得聲
聞辟支佛不得菩薩不得佛舍利弗是名菩
薩摩訶薩佛道所謂一切諸法不可得故釋
曰是菩薩依六波羅蜜摠相淨佛道問曰舍
利弗從佛聞除三惡三鹿即是淨佛道今何
以更問荅曰先說三業清淨相今說一切法
清淨相先略說今說別相先但不得三業今
不得六波羅蜜諸賢聖菩薩及佛是名淨佛
道一切法皆不可得故不得身乃至不得般
若波羅蜜是名法空不得聲聞乃至佛是名
衆生空菩薩住是二空中漸漸得一切不可

得空不可得空即是諸法實相是不可得空
義如先十八空中說

舍利弗有菩薩摩訶薩行六波羅蜜時無能
壞者舍利弗白佛言世尊云何菩薩摩訶薩
行六波羅蜜時無能壞者佛告舍利弗若菩
薩摩訶薩行六波羅蜜時不念有色乃至識
不念有眼乃至意不念有色乃至法不念有
眼界乃至法界不念有四念處乃至八聖道
分不念有檀波羅蜜乃至般若波羅蜜不念
有十力乃至十八不共法不念有須陀洹果
乃至阿羅漢果不念有辟支佛乃至阿耨多
羅三藐三菩提舍利弗菩薩摩訶薩如是行

增益六波羅蜜無能壞者釋曰佛爲舍利弗
種種分別諸菩薩次爲說有菩薩發心時無
有能壞者舍利弗驚喜恭敬諸菩薩是故問
菩薩結使未斷未於實法作證何因緣故不
可破壞佛答若菩薩不念有色乃至不念有
阿耨多羅三藐三菩提得是法空故亦得衆
生空若是法空觀空者亦空住是無礙般若
波羅蜜中無有能壞者

舍利弗有菩薩摩訶薩住般若波羅蜜中具
足智慧以是智慧常不墮惡道不生弊惡人
中不作貧窮人所受身體不爲人天阿修羅
所憎憊釋曰此菩薩先世來愛樂智慧學一

切經書觀察思惟聽採諸法自以智力推求一切法中實相得是一切法實相故爲諸佛深心愛念是無量智慧福德因緣故身心具足常受富樂無諸不可

舍利弗白佛言世尊何等是菩薩摩訶薩智
慧佛告舍利弗菩薩摩訶薩用是智慧成就
見十方如恒河沙等諸佛聽法見僧亦見嚴
淨佛土菩薩摩訶薩以是智慧不作佛想不
作菩薩想不作聲聞辟支佛想不作我想不
作佛國想用是智慧行檀波羅蜜亦不得檀
波羅蜜乃至行般若波羅蜜亦不得般若波
羅蜜行四念處亦不得四念處乃至十八不

共法亦不得十八不共法舍利弗是名菩薩
摩訶薩智慧用是智慧能具足一切法亦不
得一切法釋曰是中佛說二種智慧一者分
別破壞諸法而不取相二者不著心不取相
見十方諸佛聽法問曰云何行檀波羅蜜而
不得檀荅曰不得檀中若一若異若實若空
是檀從和合因緣生於是檀中令衆生得富
樂及勸助佛道以是故行檀亦不得檀不得
義如上說乃至十八不共法亦如是是名菩
薩智慧能具足一切法而不得諸法

舍利弗有菩薩摩訶薩行般若波羅蜜時淨
於五眼肉眼天眼慧眼法眼佛眼舍利弗白

佛言世尊云何菩薩摩訶薩肉眼淨佛告舍利弗有菩薩肉眼見百由旬有菩薩肉眼見二百由旬有菩薩肉眼見一閻浮提有菩薩肉眼見二天下三天下四天下有菩薩肉眼見小千世界有菩薩肉眼見中千世界有菩薩肉眼見三千大千世界舍利弗是爲菩薩摩訶薩肉眼淨問曰佛何以不說行般若波羅蜜生五眼而說淨五眼荅曰菩薩先有肉眼亦有四眼分以諸罪結使覆故不清淨如鏡性有明照垢故不見若除垢則明如本菩薩行六波羅蜜滅諸垢法故眼得清淨肉眼業因緣故清淨天眼禪定及業因緣故清淨

餘三眼修無量智慧福德因緣故清淨最大
菩薩肉眼最勝見三千大千世界問曰若三
千大千世界中百億須彌山諸山鐵圍陵埤
樹木等是事障礙云何復遍見若能得見何
用天眼若不能見此中云何說見三千大千
世界荅曰不以障礙故見若無障礙得見三
千世界如觀掌無異復次有人言菩薩天眼
有二種一者從禪定力得二者先世行業果
報得業報生天眼常在肉眼中以是故三千
世界所有之物不能爲礙因天眼開障肉眼
得見是故肉眼得名果報生天眼常現在前
不待攝心問曰佛爲世尊力皆周遍何以但

見一三千大千世界不能見多答曰若肉眼能過三千大千世界復有所見者何用天眼以肉眼不能及故修學天眼復次三千大千世界劫初一時生劫盡一時滅世界之外無央數由旬皆是虛空空空中常有風肉眼與風相違以相違故不能得過見異世界或有菩薩住三千世界境上計其道數亦應見他方近世界問曰菩薩及佛何以不集無量清淨福德令肉眼遠有所見答曰是肉眼因緣虛誑不淨天眼因緣清淨若無天眼當修肉眼強令遠見復次如經中說極遠見三千世界佛法不可思議經法甚多或能遠見但此中

不說小遠佛道菩薩見二千中世界不能種
清淨業因緣故小復不如者見小千世界復
不如者見四天下一須弥山一日月處又見
三天下二天下一天下千由旬乃至百由旬
是名最小肉眼淨問曰何以不說九十八十
等由旬以爲小荅曰轉輪聖王所見過於餘
人又人先世然燈等因緣故得堅固眼根能
遠有所見雖遠終不能見百由旬以是故菩
薩小者見百由旬問曰日月在上去地四万
二千由旬人皆能見何以不能見百由旬見
百由旬何足稱荅曰日月雖遠自有光明還
照其形人得見之餘色不然又日月遠故雖

見而顛倒所以者何日月方圓五百由旬而
今所見不過如扇大而見小顛倒非實菩薩
肉眼則不然問曰菩薩既得肉眼能見何事
荅曰見可見色色義色衆中廣說

舍利弗白佛言世尊云何菩薩摩訶薩天眼
淨佛告舍利弗菩薩摩訶薩天眼見四天王
天所見三十三天夜摩天兜率陀天化樂天
他化自在天所見梵天王所見乃至阿迦貳
吒天所見菩薩天眼所見者四天王乃至阿
迦貳吒天無所不知不見舍利弗是菩薩摩
訶薩天眼見十方如恒河沙等諸佛世界中
衆生死此生彼舍利弗是爲菩薩摩訶薩天

眼淨釋曰菩薩天眼有二種一者果報得二者修禪得果報得者常與肉眼合用唯夜闇天眼獨用諸人得果報天眼見四天下欲界諸天見下不見上菩薩所得果報天眼見三千大千世界禪定離欲天眼所見如先十力天眼明中說菩薩用是天眼見十方如恒河

名

大智度論

三十九卷

沙等世界中衆生生死善惡好醜及善惡業因緣無所障礙一切皆見四天王天乃至阿迦貳吒天所見又能過之是諸天不能知菩薩天眼所見何以故是菩薩出三界得法性生身得菩薩十力故如是等因緣菩薩天眼淨餘菩薩天眼論議如讚菩薩五神通中說

舍利弗白佛言世尊云何菩薩摩訶薩慧眼
淨佛告舍利弗慧眼菩薩不作是念有法若
有爲若無爲若世間若出世間若有漏若無
漏是慧眼菩薩無法不見無法不聞無法不
知無法不識舍利弗是爲菩薩摩訶薩慧眼
淨釋曰肉眼不能見障外物又不能遠見是
故求天眼天眼雖復能見亦是虛誑見一異
相取男女相取樹木等諸物相見衆物和合
虛誑法以是故求慧眼慧眼中無如是過問
曰若尔者何等是慧眼相答曰有人言八聖
道中正見是慧眼相能見五受衆實相破諸
顛倒故有人言能緣涅槃慧名爲慧眼所緣

不可破壞故是智慧非虛妄有人言三解脫
門相應慧是名慧眼何以故是慧能開涅槃
門故有人言智慧現前能觀實際了了深入
通達悉知是名慧眼有人言能通達法性直
過無礙有人言定心知諸法相如是名慧眼
有人言法空是名慧眼有人言不可得空中
亦無法空是名慧眼有人言十八空皆是慧
眼有人言癡慧非一非異世間法不異出世
間出世間法不異世間法即是出世間
出世間法即是世間所以者何異不可得故
諸觀滅諸心行轉還無所去滅一切語言世
間法相如涅槃不異能得是智慧是名慧眼

復次此中佛自說慧眼菩薩一切法中不念
有爲若無爲若世間若出世間若有漏若無
漏等是名慧眼若菩薩見有爲世間有漏即
墮有見中若見無爲出世間無漏即墮無見
中是有無二見捨以不戲論慧行於中道是
名慧眼得是慧眼無法不見無法不聞無法
不知無法不識所以者何得是慧眼破邪曲
諸法無明諸法揔相別相各皆如法問曰阿
羅漢辟支佛亦得慧眼何以不說無法不見
無法不聞無法不知無法不識荅曰慧眼有
二種一者揔相二者別相聲聞辟支佛見諸
法揔相所謂無常苦空等佛以揔相別相慧

觀諸法聲聞辟支佛雖有慧眼有量有限復
次聲聞辟支佛慧眼雖見諸法實相因緣少
故慧眼亦少不能遍照法性譬如燈炷雖
淨小故不能廣照諸佛慧眼照諸法實性盡
其邊底以是故無法不見無法不聞無法不
知無法不識譬如劫盡火燒三千世界明無
不照復次若聲聞辟支佛慧眼無法不知者
與一切智人有何等異菩薩世世集福德智
慧苦行何所施用問曰佛用佛眼無法不知
非是慧眼今云何言慧眼無法不知答曰慧
眼成佛時變名佛眼無明等諸煩惱及習滅
故一切法中皆悉明了如佛眼中說無法不

見聞知識以是故肉眼天眼慧眼法眼成佛
時失其本名但名佛眼譬如閻浮提四大河
入大海中則失其本名何以故肉眼諸煩惱
有漏業生故虛誑不實唯佛眼無誑法天眼
亦從禪定因緣和合生故虛誑不能如實見
事慧眼法眼煩惱習未盡故不畢竟清淨故

捨佛眼中無有謬錯盡其邊極以是故阿羅
漢辟支佛慧眼不能畢竟清淨故不能無法
不見問曰佛現得果報肉眼能見色是事云
何荅曰肉眼雖生眼識而佛不隨其用不以
為實如聖自在神通中說佛告阿難所見好
色中生厭憊心眼見惡色生不憊厭心或待

見色不生汙穢不汙穢但生捨心如是一則
眼無所施用復次有人言得聖道時五情清
淨異本復次諸法畢竟空及諸法通達無礙
是二揔為慧眼

大智度論卷第三十九

名

趨

合

作

躡

適

無

物

上音

陵

埠

下音

負

